

Tico Croes kier sa si ta verdad cu INTERVENI DEN ASUNTO INTERNO DI ARUBA??

ORANJESTAD (APA)

Tico Croes, miembro di fraccion di AVP den Staten, a sigui cu e serie di pregunta na promé minister Nelson Oduber y e biaha aki, ela desea di haya confirmacion, cu e hefe di protocol di Congreso Venezolano, lic. Omar Perez Yepez, durante su bishita na Aruba luna pasa, a interveni den e situacion di pagamento di trahadornan na Aruba Concorde Hotel.

Ministro presidente por confirma e hecho cu e tabata na altura di e meta di e bishita di Perez Yepez? Si t'asina cu e hefe di protocol di Congreso Venezolano a bini riba instruccion di gobierno Venezolano. Si no t'asina riba ken su instruccion e tabata actua na Aruba anto?

Premier Oduber ta di acuerdo cu ta un situacion peligroso y inacceptabel cu un oficial di un gobierno exterior ta bini Aruba pa interveni den un asunto netamente interno di Aruba, manera relacionnan laboral entre trahadornan Arubano y nan doño di trabao, Tico Croes ta puntra. Kico premier Oduber y gobierno tin pensa pa hasi pa evita repeticion di e tipo di intervencionnan extranhero asina?

Por ultimo, premier Oduber por informa Parlamento si e asunto aki lo tabata topico di combersacion durante di su bishita na Venezuela siman pasa?